

LA USC DI LADINS – VENERDI' 19 GENNAIO 2018

Temp de Carnascèr te noscia val!

Con la sègra de Penia scomenza l Carnascèr ladin. En sabeda ai 20 la pruma mascherèda

Cultura - Desche da tradizion l Carnascèr scomenza tinsom la val e dò aer vedù la pruma mèscres da Sènt'Antone, se va inant chisc dis con la sègra de Penia, chela de Sèn Bastian ai 20 de jené.

La sègra chest an la vegn de sabeda, en chela di da les 10 dadoman vegn dit messa con orazioms e letures per ladin e dapò dò messa, te Piazz, l Grop de la Mèscres de Dèlba e Penia fèsc té, vin ciaut, liènies e grostoi per duc. Vegn fat la peisa de l'ardel e ence la gara di grostoi con la cercia che sarà

sa la veia scoles de Penia dò l besper, che l scomenza da les 3 domesdi.

La Festa dapò jirà inant da sera, da mesa les nef, semper te la veia scoles olache vegnarà spilenà la pruma mascherèda del Carnascèr ladin de chest an. Laché, Bufons e Marascons scomenza, dapò l president del Grop dela Mèscres, Ezio Verra, dirà fora i venjidores de la gara di grostoi. Sobito dò vegnarà destudà la lums e fat lèrga sun paladina.

La pruma mascherèda de chest an l'é "I doi Jan a lita" de Simon Soraperra

de Giulio; la vegnarà spilenèda chesta sabeda ai 20 de jené e la jebia grassa ai 8 de firé. I atores l'é Ezio, Paul e Marco Verra, Andrea Eccel, Daniele Iori e Martina Debertol.

L'otra mascherèda l'à per titol "I trei bricons" e la é traslatèda da Fabio Dantone de la Menina. La vegnarà spilenèda en sabeda ai 27 de jené e l'ùltim de Carnascèr, mèrtesc ai 13 de firé. I atores l'é Diego Salvador, Luca Dantone, Simone Valeruz, Ivano Verra, Angela Soraperra, Fiorenzo e Matteo Iori.

Chest an, 2018, l Grop de la Mèscres de Dèlba e Penia fèsc i 50 egn. L grop l'era stat metù sù de november del '68 e da enlouta l'à semper seghità a portèr inant la tradizion. L president Ezio Verra de Pilon ne à dit che i aessa volù fèr zeche de spezièl jà per chest Carnascèr, ma no i é stac bogn de portèr a termin l lurier e donca se jirà a fèr festa via per d'istà, con la Sègra de Sèn Roch ta la Sia de Penia. En chela di vegnarà prejentà l DVD con ite duta la mascherèdes spilenèdes te chisc egn dal Grop. Chela più veies amò te cassetta les à cognù vegnir toutes sù sul computer e en dut l lurier dalbon gran no l'é amò stat fenì. Endèna donca, bon Carnascèr ladin a duc chenc! (vr)



N moment del Carnascèr 2017 te la vela scoles de Penia.

